

Hati-hati ancaman jelmaan Malayan Union

UM - 5/12/2006

Oleh ROHANI IBRAHIM

JOHOR BAHRU 4 Dis. - Ancaman konsep yang sama seperti Malayan Union kepada orang Melayu sebenarnya masih belum berakhir dan ia kini muncul dalam bentuk yang berubah-ubah.

Prof. Madya Dr. Shahrudin Maaruf (**gambar**) dari Jabatan Pengajian Melayu, Universiti Nasional Singapura (NUS) berkata, kaum Melayu harus sedar dengan pelbagai bentuk ancaman mirip Malayan Union yang datang dalam jelmaan baru.

"Jika kita tidak mengambil berat perkembangan ini dan mengusahakan maklum balas yang bersesuaian dan berkesan, lama-kelamaan kaum Melayu dan tamadunnya akan terpicil daripada pandangan dunia.

"Dari aspek strategik, ini adalah sangat berbahaya bagi hak dan kepentingan Melayu," katanya ketika membentangkan kertas kerja bertajuk *Pemikiran Datuk Onn - Maknanya Dalam*

Politik Melayu pada hari terakhir Persidangan Kebangsaan Mengenai Datuk Onn Jaafar di sini hari ini.

Menurut Shahrudin, bagi menyambung perjuangan Datuk Onn dalam mempertahankan maruah, hak dan kepentingan kaum Melayu, semua pihak mesti memahami perjuangannya

dalam konteks yang luas.

"Kita juga mesti memahami cabaran dan gugatan yang datang dengan luas dan berhikmah pula. Konteks perjuangan akan berubah seperti juga bentuk dan sifat gugatan itu.

"Dalam apa juga konteks dan apa juga rupa cabaran dan ancaman yang kita hadapi, semangat Datuk Onn yang berjuang dengan keyakinan moral dan kepatuhan kepada prinsip peribadinya itu perlu kita teladani," tambah beliau.

Shahrudin berkata, isu politik secara langsung banyak pula menyerang budaya dan legitimasi Melayu itu sendiri secara halus.

"Misalnya, dalam bidang sains kemasyarakatan, dengan bertopengkan penyelidikan akademik ada pihak sengaja memajukan teori yang menghakik kewibawaan moral dan budaya Melayu.

"Mereka menjalankan penyelidikan berdasarkan kajian bagaimana orang Melayu dan Islam bersikap kurang toleran dan melampau dalam kehidupan beragama dan perhubungan antara kaum.

"Maka diperkenalkan pula apa yang

digelar kajian gender di mana rumusannya tidak boleh tidak menjurus kepada penghakisan kewibawaan dan legitimasi budaya Melayu itu sendiri," jelasnya.

Kata Shahrudin, rumusan kajian yang dilakukan ialah Islam dan kebudayaan Melayu menindas wanita, hak wanita tidak dihormati dan menutup aurat merupakan konspirasi lelaki untuk mengawal wanita.

Apa yang paling menyedihkan, ujarannya, idea-idea sedemikian sudah mula mempengaruhi orang Melayu sendiri.

Misalnya, tanpa disedari ramai juga penuntut di kampus yang sudah tersogok dengan bahan bacaan ini dan mula memandang rendah budaya dan bangsanya sendiri.

Shahrudin menambah, legasi terbesar Datuk Onn ialah kebangkitan Melayu dan kesedaran Melayu untuk mempertahankan hak, kedaulatan, agama dan raja-raja mereka.

"Datuk Onn juga pernah mengeluarkan kenyataan, jangan berjuang untuk Melayu tetapi berjuang sebagai bangsa Melayu," katanya.